

福建通志

第捌拾玖

共壹百捌

福建孝義傳十三

清一

林偉字堅之父公衡以貢生授廣東南寧通判。賊亡竄冒竄南寧北鄉有從粵西來者傳言不一。偉憂鬱廢食寢遂決計往尋入南寧徧叩官吏故老無知者。屈曲行山穴中金盡力疲夜宿天鏡山投老僧。維髮僧愕然曰公孝子也。乃贈十金令行。腳指示途徑行百餘步有亭半傾中有木主字明滅不可識。拭去塵土見有南寧通判林公六字。偉狂號曰吾父在是矣。抱主返庵途遇老翁聞偉語音曰子閩人耶胡爲至此。偉告以故翁亦泣曰吾亦閩人祖孫客此三世遭亂離未得歸閩。明年曾有官南寧者歿於北鄉柳坡鄉人德而祀之。其卽子父耶。偉伏地持翁哭往驗封土。隆然諷曰啓土負遺骸謝山僧歸計其行歷二萬餘里千四百餘日友人聞而哀之助之葬。閱月舟至延平津失足墜水死。

林塗撰傳

張之材順治五年土寇圍城城內食盡守者下令出城市米必官給符以

行民憚賊逼寧爲餓殍之材痛父母垂斃出市米賊要奪之之材大呼曰
是將以活我父母者忍見奪耶遂奮勇手批賊數輩賊亦拳毆之折脅流
血匍匐至南關以所給符未失門者納之時圍城中無醫藥而創自平父
母亦無恙

鄭起順治五年兵荒父母及祖父母相繼歿起年十七備嘗艱苦撫二幼
弟成立旋俱蚤世撫諸姪及姪孫如撫其弟晚年復捐金收骸施棺

施元暘字賡白年十三割股療父疾順治五年福州饑元暘出已粟分贍
族衆十三年海寇圍城居民分陴堅守寇尋退有瑩地在北麓奸人盜鬻
某姓臨窆事覺元暘見其七棺半朽竟捨之

林靖字獻卿侍母數月不解帶事嫂如母撫孤姪如子順治五年饑分粟
鄰里

葉良駒順治五年疫氣盛行良駒施藥全活甚衆死不能殯者埋之歲饑
傾廩以濟子宗秉承父志構書舍延師課族子弟置義田爲膏火資又建

宗祠增祠田同縣林鑣字永範庶弟錡幼鑣篤愛之及成立推產以讓
江汝修順治十年冬海寇周瑞登岸肆掠汝修與弟汝欽有勇力率鄉人
禦之殺賊數十以衆不敵鄉人潰兄弟被執賊曰爲我用資汝死俱不從
賊怒并殺之逾二日子大美收二屍面如生遂合葬於上井山

楊必亨監生年十三從父讀書光德里順治十三年海寇掠福州父被執
必亨哀告願以身代賊感動父子得俱脫母患末疾起居飲食悉躬親半
年不少怠

趙沂字閨仙順治己亥進士選新城知縣地瘠民貧豪黠者多逋負沂歎
曰邑逋糧吏無以稱職而急操之是子民而仇之弗忍也以病告歸後寇
薄城焚城外民居有從寇中呼曰毋邇趙長者家沂比屋數百家得免及
避寇東山下東山民亦免於寇難

鄭璿字若文父正誠教諭南安海寇陷泉州僞官俘知縣及教諭幽廈門
璿徒跣奔往見其父父曰吾命懸呼吸兒留增一累宜急歸璿悲傷饑餓

卧同學翁姓家頃之父至曰偽官已議釋歸兒盍先渡海璿遂歸逾年而父不返傳偽官悉解臺灣璿復蹈海尋父至臺灣而父先遁歸奔回而父先抵家三月矣

翁應宣字士宜孝事繼母敬養兄嫂撫姪如己出耿藩之變勸之仕不從避地福清讓產睦族

林萱字乾之諸生康熙十五年清師逾嶺明帥潰卒南下者擄掠無虛日萱率鄉民竭力堵禦里黨賴以安全耿變既定海寇復揚帆內地索餽餉不滿其欲不去濱江海民苦之萱復營贖金凡九閱月事集而難解

林可棟字能任隆武時由太學生授以職辭不仕避跡鼓山欲薙髮爲僧提督楊捷開關閩疆知其賢寄以帷幄軍興擾攘之頃不得已應之時山海交訌桑梓鼎沸可棟居中多所保全總制李初下車延諮機宜可棟區畫瞭如指掌李亦推心置腹信任不疑如却紅夸請居內地罷勦海無益師旅以及開海復界諸條議皆非書生所敢言范承謨入閩禮聘可棟時

年六十有九矣耿難作與同事稽永仁被囚可棟獨爲主者呼入殿中訊之知永仁將不免慷慨相向曰余老矣死固其分願以身代永仁謝之又密謂永仁曰公死我輩誓無獨生理陰以鐵鎖換喉頸舌吐寸許而手軟不自支遂復甦後以九十三歲老母在戚黨營救脫於難乃收永仁骨殖殮付其僕而承謨死狀及畫壁諸詩歌皆由可棟以傳

抱犢山房集

林和字玉伯晚號北圃父必達歷階懷遠將軍和隨宦秦晉從奮威將軍入川用勞績劄授參戎康熙丙子和舉省試第一父卒母老遂絕意仕進慨然以謂周官亡後保息本俗之政盡失顧諸所爲族墳墓聯兄弟師儒朋友與閭比族黨州鄉相保受葬救賙賓之法未嘗不可施於家政振濟於人人乃廣墓田構支祠修宗牒昏嫁族中之孤者別祖以下閭門千指合食者數十年復越山書院以業郡之秀民尤重急難歲推所入貧無業者予貲疾無告者予藥施構痊醫至千餘具興義冢禁阻葬他如橋圯道茀自鄉閭郊野以至外州郡輒治數十處晚營墅城北環碧軒皮書數千

卷杜門佚老其自號以此然聞當世水旱利病輒惻惻如負官守之責雍正癸丑福寧桐山饑運粟減直活餓者無算州牧將上其事力辭寢疾前一月郡恆雨米翔貴立出金請於官買浙中米平糶疾且革問海運至未顧語諸子曰善經理之磬磬可念也初從宦山西道遇病者偉其狀療之請懷遠編諸伍卒以軍功顯然終不言其人嘗代監司宛平某公身後償官逋數千緡聞者歸義和遜勿居郡城北陬災療將及忽反風家獨完衆謂信順之祐和笑曰偶也孫光鋒已未進士

潘汝誠趙國麟撰墓表

謝宣字爾甸事兄宏如嚴父一錢寸帛必稟命焉嘗傾囊爲業師林啓平葬及五世康熙庚午舉副貢出閩縣知縣溧陽吳琇之門琇以挪移缺額去官家累二十餘口宣繼粟肉三年無缺琇迫於對薄謀鬻養女閔氏以償宣聞之以告宏宏立措三百金遺琇止閔氏已而琇復如前謀將舉券宣白兄復醵錢爲琇納緩昇女於家宏撫爲已女盛裝資擇佳耦歸之琇寓失火焚死宣亦尋卒宏買舟給資糧遣孀婦王氏孫天保十餘口還溧

陽宏康熙丙子武舉人宣子道承

林祖植字建伯父蕤春被累株及祖植慮父獲罪挺身代質父不忍欲自投獄祖植泣曰身父之身也以身代父子職也父有子而坐視父入獄生不如死及論成永平會李光地巡撫直隸稔祖植孝力請減等釋歸

吳庭雲字崇卿康熙四十六年壽躋百有二歲子尙焜年七十事期頤老父晝則杖隨夜則聯榻一宿三起寒暑不輟父卒時年八十餘苦塊必循禮

劉兆基字開周一字石湖康熙戊子舉人雍正元年巡撫滿保以孝廉方正薦至京以病乞歸尋授平和教諭未踰年解組歸兆基早失怙家貧授徒以養母先意承歡母卒哀毀盡禮竭蹶營葬事必誠必信主共學書院講席多所造就

莊念勤字若丹自明思正後莊氏紹書香者十三世至念勤始舉雍正癸卯鄉試生平力學史鑑諸子細加評晰貢笈來遊者多掇巍科而去母病

與弟庠生其綦衣不解帶者二載兄弟式好視姪猶兒

林世發字君奮父歿哀慟幾不欲生母老病日夜侍湯藥不倦撫三弱弟極友愛後相繼歿鞠諸姪無異已子腴田大厦悉以讓之鄉鄰高其行有爭訟皆取決焉

張綸字道羽貢生執親喪三年絕葷酒置田以供祭祀又析產與弟餘悉給族之貧者自是綸亦貧縕袍粗糲恬如也

孟傳德字惠卿嘗晨出見遺金於道待其人至還之性好書節縮衣食輒購書凡所讀者必手錄之好醫錄方書亦積數十卷孫超然

王廷樸字維才喪母廬墓三年墓離家五十餘里每三日一歸省父父歿仍廬墓歲時祭祀雖久涕泣如初篤於兄弟約歿必共葬預爲同穴之壙戒子姪勿違

魏開業府學生早喪母哀毀盡禮隨父端餘客吳門先意承志父欲振貧周急皆力辦之娶繼母陸氏舉五子開業撫諸弟怡怡友愛幼弟開德患

痘幾殆而父甚愛之開業禱於神願減已算以益弟年已而果瘥體素羸父病用刻削劑日嘗藥以進勞瘁而卒

何佩珠字嘉瑞雍正閒拔貢生母歿哀毀骨立季弟早世撫其幼子教養兼盡及長又卒更卹其遺孤割田數百畝置祀業又給衣施櫓周郡中節婦之貧者

趙繼蕃父病割股以進父母歿以哀毀卒同里方元干母高氏病革元干禱於神請減年以延母壽又刲臂調羹以進母病遂愈後母歿以哀毀卒江際田父廷相病篤際田割左臂以進劉志清父病甚割肝以進高行均節母陳病革同姊割股調糜以進

何長浩字得然自福清遷閩縣勇於爲義府學遭颶風將圯長浩獨力任之又葺侯官南平二縣學修建南臺大橋臨卒囑其子員外郎際速建福州試院乾隆十年大府疏請官其一子同郡王以標自西安塘至洪山橋路壞亭圯捐貲甃砌

陳榮字如芝例貢生父歿年方十三及葬兄在墳操作隨往攸助母鄧氏止之以號泣請墳成朔望必造墓所哭奠母病服侍左右不解帶者旬餘母終水漿不入口者累日兄病禮斗七晝夜願以身代兄歿恆涕泣言吾兄勞瘁半生不享其年全家衣食皆兄之賜也兄遺孤甫十齡素有哮喘疾榮護視備至既長授室而歿從孫廷魁長延名師課之讀道光壬午廷魁舉於鄉弟不過稍分其勞及析產均平如一人有資貨物以賈而失利者益其貲使不失業或析券不留族屬戚友沾其潤者數十家喜義舉文昌宮萬壽橋皆捐貲以藏其成云子駿元字卓齋母卒哀毀不食父喻以傷生減性乃稍進糜粥茹素者二年父疾調護不離左右父以駿元長佐理家政勞囑倍予產業駿元泣讓戚友婚葬及應試計偕力飲不吝遇歲疫必製藥濟人親自檢點道光丁亥歲拓修貢院捐金襄事

以上道光舊志

陳智字昌守生平好施與有貧乏不能自存者無親疎必多方賙之嘗於路拾遺金待其主還之子三隆貢生藻增生乾元附貢生曾孫若霖在列

傳 螺江陳氏家譜

陳世元監生因熟悉樹藝之法自願赴河南教種番薯年老急公遠涉患病身故巡撫畢沅爲奏賞國子監學正職銜地方官妥爲照料

東華錄

薩龍光字肇藻號露蕭自其祖父業鹽筴百有餘年好施予龍光性孝友與人忠信其在戶曹也郎署例有餐錢人歲數百金悉留以資京僚之清貧者不足則捐貲以濟同郡之謁選及試禮部者多館於龍光所數常居會館之半鄉宦某逼逋負將以身殉龍光偵知傾囊解其厄及連丁外內憂伯兄復卽世遂無宦情且念子姪食指數千親故待以舉火百十家因專治鹽筴從子旣長則分祖遺及伯兄手牒業歸之而鹽政日敝所代承課額不下數十萬金推惠老幼鰥寡病死者貧無以嫁娶斂埋者族戚之月需錢米者士子之赴省試禮部試者親以逮親友以逮友往往無半面之識莫不給求自舟人哨丁臧獲乳媪以及百工人人得其欲以去林袁州其宴先與同部相善卒官家貧子又夭乃娶其女爲子婦以恤其婦若

孫寧福道某一面之交歿爲辦喪具眷屬淹滯周之歸久之猶時寄金恤之侯官令某以虧空干吏議倉卒求助慨然與之西郭外宗祠圯於風捐金新之並修湖西第一亭其他如增置龍峯書院學舍修洪山橋建東街文昌祠修鼓山湧泉寺乙卯之賑饑丁丑之濟河皆倡輸千金或數千金居郎署時長官將擢充軍機章京及寶泉局監督皆辭於鹽務每爲通商籌利弊多有便於人者嘗誦西銘之語曰富貴福澤將厚吾之生使之爲善也輕乾隆辛丑成進士選翰林院庶吉士散館改部主事卒年六十有七葬西郊羣鹿山之陽

左海文集

趙承烈字忠美號淞船乾隆戊申舉人截取知縣借補惠安學教諭母久病侍湯藥無少懈出節相蔣礪堂門蔣深器之延課子在節署二十餘載未嘗干一外事及歸將所得修金買田宅均分兄弟無一毫私已只一子十九而殤媳陳氏未婚守節

陳蕭南字蕙畹貢生幼知禮讓居父喪廢餐累日事母葉氏菽水能得歡

心母病風攣兩手不舉薰南每飯親哺或出就館閒日歸則妻張氏代哺有友宰厯城歲訂五百金延之幕以母老病堅辭反其幣母壽八十有一親哺者二十餘年無閒父沒時三弟俱幼薰南筆耕以給皆爲授室以迄成立幼弟光清苦學病瘵卒無子命次子篆爲之後勸學勵品用優行貢以成第志著有鋤經書屋文集啖蔗齋遺艸

梁升南諸生父歿哀毀廢餐母在堂竭誠孝養母年七旬暑月抱病南晝夕奉侍竟忘酷烈兄異產棄世後撫其姪如子同產弟以瘵夭亡鞠遺孤比長爲營生業戚友婚葬力不能舉者傾飲不吝

鄭嗣昌字定爵監生乾隆六十年米價騰貴嗣昌倡議捐貲遠糶他郡減價平糶時同縣許音亦出藏粟減價散糶親族默禱於神減年以延親壽鄭義正父病足疽醫治無效或謂吮之可愈義正請於父父責之曰余病在膚毒入兒口患及腹心奈何義正號泣以求從之數日疽遂痊母得偏枯症舉動需人義正卧母側侍奉三年母病亦瘥父咎其兄義正請曰兄

弱難任鞭撻兒願爲兄分痛父因之息怒焉

鄭璿字子中諸生父羽侯胸生疽璿禱於神願以身代父卒母方氏病醫治無效乃發篋陳百家方書得母病之由治之立瘳遂以方濟人族之孤女因亂沒爲婢者二贖而嫁之子恭縣學生補抄謝皋羽晞髮集五卷至八卷爲之後序又作月令中星考均田論學使沈涵器重之

袁載榮職員幼有至性父早歿歲時造墓哀慟感人事母黃氏曲得其歡母老而康強六代同堂兄舉人濤自幼式好兄卒撫姪成立同居百餘口內外和睦族黨無閒言子冠芬冠芳先後舉於鄉

以上道光舊志

陳心恬父母早亡依繼母庶祖母叔母以居小有過長者督讓之俯首拱聽悵慕亡親哀意菀結在繼母及尊長前溫清定省怡顏若無戚者年十九血疾作踰年竟卒

藍水書塾文章

何履旭嘉慶間隨其父出洋揚颶二日父歿海舶履旭以衣裹屍同卧浹旬俟舟抵埠孝子始敢放聲哭同舟視之屍已朽腐

採訪冊

何道源字廣文父志高負販廣東遭風漂泊不返道源年十五屬弟道泉奉母而獨往廣東遍訪不得一夕宿古廟夢神告曰爾欲尋父盍往越南道源欲附商船往而貲已罄商人詰其故曰孝子也不受其直遂至越南果得父時父病瘵服事五月而卒道源佐人選藥葬父而返與弟奉母惟謹母卒廬墓三年每朔望必偕弟至宗祠讀祖訓以勸族人歲暮於普濟堂按名給錢又建塔於漏澤園以掩枯骨

抑快軒文集

廖岡陵字陸峯父昂官把總以剛直忤上官落職懼禍及避去時岡陵甫九歲泣告諸父執爲營護事白而父去不知所之乃白母往尋徧歷郡縣久之遇於永安旅次奉以歸母好施與苦家貧岡陵置篋於室實錢其中匱則密益之戒家人勿以聞長姊嫁延平母思念之陰遺以貲勸其遷居省城次姊與妹皆早寡母憐之遂與同居月給薪米撫其孤成立通堪輿家言有力者勸之葬無力者助以資子鴻翔嘉慶戊寅舉人廣東知縣鴻禧道光乙酉舉人鴻苞嘉慶丁丑進士四川雲陽知縣鴻藻鴻荃均見列

傳 補遺書齊遺稿

案鴻藻鴻奎籍侯官道光志以岡陵入閩縣仍之

陳士鑑習儒業以佐父持家累故棄就會計父病侍奉調護不解帶者月餘事兄誠敬以雍睦訓族衆歲祔倡先出粟賑貸貧乏里閭中遇有忿爭力爲排解

道光舊志

吳桂森字啟芳年十一聞父遠謫堅欲隨侍母憐其幼執弗遣越五載母卽世百日後忽失所在乃一路行乞往尋父也時年甫十六既至父所侍左右跬步不離者五年父令歸試則跪謝曰兒知有天倫之樂不慕功名也令歸娶又跪謝曰兒齒尙穉不急妻也嘉慶庚午父遭病顛天求代竟成疾卒年二十有一里中士族魏應梁女名水音善事父母年及笄猶矢不字父母違其意擇字桂森及聞耗慘然曰兒不能全孝矣遂堅卧不起絕粒死

吳氏家乘

蔣春堂字振器年十九父病劇醫者言胃將敗春堂顛天大慟父歿水漿不入口者數日母諭之曰爾家貧弟妹幼爾哀毀滅生弟妹何以活爲乃